


[www.BibleForChildren.org](http://www.BibleForChildren.org)


# Matiu 26



Amaridi lima-teke  
isi dieno be  
'Pasoba' moanako  
bong ne dapura kana  
nge Iesus itui be Betani  
anua-lo ilako. Betani nge  
Lasarus anua ne. Be nge  
Lasarus ngae ka imate be  
Iesus kaba imarangaki.



Kodeka Maria  
itaguraki be bureng  
boau rongorong  
zazaia atabalabala-tina  
kai ara 'nad' oti emaka ipura  
bulo tekena-lo ieno nge idoki  
be Iesus ae babadi-o  
isuburakaria be donga  
ane iutu. Bureng ngae  
boau nge pera ilo ilolomi.




Kodeka Iesus tagataga ne kulemoa-be-rua teke ara Iudas Iskariot nge itaguraki be tamoata Nanaranga ditabatabai dimuamuadia-lo ilako be Iesus ngadoki be luma-dio nganangai kana.



Tamoata ngaedi ludas pilenga dilongo nge direre-tina  
be dirai masa alauri 'mone' oti dazazai. Makara be  
ludas zala ilelelei masa bong  
nangatanao zala iauia ngapurani  
be Iesus ngadoki be luma-dio  
nganangai kana.



Kodeka tagataga ne dialale be  
Iesus kana irangaki nge diemaki,  
be dilako be kana ono 'Pasoba'  
dakani kana nge dimoataungaki.  
Dimoanakonako nge Iesus 'bereti'  
teke idoki be Nanaranga iperui be  
ikotoi be tagataga ne iandi be bokai  
ipile, "Kamadoki be kamakani.  
Ngae nge ngau tamoata-gu."



Kodeka 'uain' sema tekena-lo idoki  
be Nanaranga iperui be iandi be  
bokai ipile, "Kamadoki be kam  
moarunga kamasing. Ngae nge ngau  
darakagu. Be nge darakagu ngae  
oti ka Nanaranga taoa ne oauoau  
tamoata be aine ne zaiza iemakadi.  
Darakagu usuburaki be ono  
Nanaranga itaguraki be  
tamoata  
kokoko-tina oti  
nedi irokakiledi."



Kodeka Iesus Pita bokai irai, "Saimon! Saimon!  
Golongo! Satang ambe itegi be toia-ming ngapura  
kana, suri niu kozomadi dipurapura bokana. Kozomadi  
dapura be kalingodi dokiadi dapura be zipidi rokakadi  
dapura. Ata ngau ambe kaiko kanabe Nanaranga  
uraboi. Bokai masa lama uniangam tago daleua.  
Be alauri kaba ngau-lo  
kumule masa  
taritokam  
goaka-kaidi."



Ata Saimon ikatu be bokai ipile, "Tanepoa, ngau ambe ukatiuana ka usoaki, be uboadu-tina kaiko kitaru be uaura-lo talakoru be tamate-buduru." Be Iesus ikatu be bokai irai, "Pita! Ngau ka uraiko. Kaituka masa mang tagona-la ngakatararaua be masa bong toli goaoli be gopile tago kukauataka."




Kodeka Iesus tagataga  
ne zaiza be kaba aradi  
Getsemani-lo dilako.  
Makara nge bokai iradi,  
"Maka kamasoaki be  
ene mlako be mrabo."  
Kodeka bokai ipile,  
"Tama-gu. Negu Tamagu,  
kaiko kuboadu kana  
moarunga goemaki. Sururu  
ngaedi godokilea. Ata moaki  
rerengagu kutagadi. Kaiko-la  
rerengam gotagadi."




Bokai ka ludas nena-la be makara ipura. Rom koai-bagi tamoata kokoko be tamoata Nanaranga pera ne dinarinaringi nge alu ludas ibagadi be dipura-budu. Parasi be tamoata Nanaranga ditabatabai dimuamuadi dinepidi ka ludas zaiza be dipura. Baratui be koalea be kana ono eunga didokidoki be dipura.



Makara nge tagataga ne teke itaguraki be asi ono eunga ne ipasiki be tamoata Nanaranga ditabatabai biabiatuka nedi malipilipi kana kungi oana izantotoki be itakoro. Ata Iesus itaguraki be bokai ipile, "Iboadu! Moaki kaba bokai kamuzi!" Kodeka Iesus ilako be tamoata ngae kungi idoki be kabana-lo inangalako be iadoraki.




Kodeka ditaguraki be Iesus didokimatei be diuauri be tamoata Nanaranga ditabatabai biabiatuka nedi pera kanana-lo dilakuaki. Pita nge lauaba-nao be itagatagadi. Eoa bibia tekedi nge pera nge aro ditau be tamoata alu nge diboaling be disoaki. Be Pita ilako be disoaki-budu.




Kodeka tamoata  
Nanaranga ditabatabai  
biabiatuka nedi malipilipi  
kana teke Pita bokai  
irai, "Kaiko-tina bokana  
'olib' uma-lo tamoata ngae  
zaiza be uteko?" Tamoata  
ipile nge Malkus dara ne kata.  
Malkus kungi takaia ka Pita  
itaratotoki. Makara nge Pita  
kababe iaoli be bokai ipile, "Ngau  
tago!" Bokai ipile nge oaikiki-tina  
mang ikatararaua. Bokaibe Pita  
eluku ilako be tang  
biabia-tina iemaki.



Kodeka tamoata bibia moarunga ngaedi nge dituirake be Iesus diaromuani be Pailot-lo dilakuaki. Bokaibe Pailot itaguraki be Iesus bokai itegi, "Kaiko Iuda anuatanepoa kandi ki?" Be Iesus ikatu be bokai ipile, "E, kupile-la bokana."




Pailot irere Iesus ngalikitaki be  
ngalale. Bokaibe tamoata be aine  
makara disoaki nge kababe iakorodi.  
Ata di dimere be bokai dipile,  
"Kai kapalapala uauau-o  
rokatagaka ngapura!  
Kai kapalapala uauau-o  
rokatagaka ngapura!"




Kodeka Pailot itaguraki be Iesus idoki  
be iandi be kai-o rokatagaka ngapura  
kana. Kodeka Rom koai-bagi tamoata  
nge Iesus didoki be dibagai.

Be nena-la be kai kapalapala uauau  
ne ibazi be kaba aradi "Tamoata  
Pangana Pakina-ba Kaba Ne"-nalo  
ilako. Ibru pile-lo nge Golgota kana  
ditugani.




Makara nge kai kapalapala uauau-o  
dirokatagaki. Be tamoata rua nge  
Iesus zagenao kai kapalapala  
uauau-o dirokatagaki-diaru.

Takaia oanana-o  
be takaia  
ngasina-o.



Amari nge ileua be tago imalamalama. Makara nge kusi biabia Nanaranga pera ne ilona-lo itobitobi nge imasare be ege rua ipura. Kodeka Iesus kaikai-la bokai imere, "Mamo! Mariabakagu lumam-o usalangaki!" Bokai ipile be imate.



Arimatea tamoata ara Iosep ipura.  
Iuda tamoata nedi bibia maradi  
nge ngai ara otioti. Ngai  
tamoata iauia be bong ono  
Nanaranga ngatanepoa  
kana nge  
irapurapungi.

Bokaibe nena-la  
ikaingaki be ilako  
Pailot

aro itui be Iesus  
mate ikeliaki.  
Kodeka Iosep kusi  
oaoaoa teke ibagai  
be Iesus ioraria be  
kusi ngae oti  
ikingsukumi be  
gimoa teke ilona-lo  
inangalako.




Gimoa ngaie nge patu kanabiabia  
teke ilona-lo ka emaka ipura.

Kodeka loseep patu  
kanabiabia teke  
igegeakalako be Iesus  
poda aoa ono ionoti.




Izama nge bong biabia ono manauanga,  
ara 'Sabat.' Bokaibe tamoata  
Nanaranga ditabatabai  
dimuamuadi be Parasi  
dilako be Pailot dite  
be bokai dipile,  
"Biabiadi, tamoata  
bolinga ratadi isi ne  
iauia nge bokai  
ipile, . . ."




“... ‘Amaridi toli muridi be masa  
ngamarang be moauriuri ngasoaki.’

Be dialale be poda  
dionoti. Babari  
kaiboangina-tina ono  
dinangai be tamoata  
alu makara  
dinangadi be poda  
dinariningi.”




Bong ono manauanga 'Sabat' imanubu  
be kaba izama-seresereki nge  
Magdala aine Maria be  
Maria-la takaia nge dialaleru  
be Iesus poda datearu  
kana. Makara nge  
oaikiki-tina rike  
kanabiabia teke  
ipura be Tanepoa


'enzel' ne teke  
lang anua-lo be  
ibala be patu ono  
poda onota ipura  
nge igegeaki be  
ono isoaki.



Tamoata poda dinari-naringi nge  
taburidi dira-tina be reresabu  
nge tagona-tina diuia be  
makara matedi  
bokana dituitui.



Kodeka 'enzel' itaguraki be aine  
ruoti ngae-diaru bokai ira-diaru,  
"Taburi-mingru moaki dira!  
Ngau ukaua Iesus maka  
kai kapalapala uauau-o  
dirokatagaki ka  
kaleleleiaru! Tago  
maka isoaki. Ambe  
imarang, ne ipile  
bokana.




Kamamairu  
be kaba odio ieno  
kamaitaru."




Moimoi aine ruoti ngae-diaru nge  
taburi-diaru dira, ata suri-diaru diuia-tina.  
Kodeka poda diperekiaru be  
dipapanana-lanaru be Iesus  
tagataga ne daradi kana.



Ata oaikiki-tina Iesus zala-lo ipuraka-diaru be bokai ira-diaru, "Suri-ua ngaeno-kamingru!" Kaba bokai ditaru nge dilakoru be dirokazokuriaru be Iesus ae diboabungru be dirakeakiaru.





Alauri nge tagataga ne kulemoa-be-teke disoaki be dimoanakonako be ipurakadi. Makara nge itaguraki be iebulodi, bakara, ilodi nge dikaingaki be lama tago diuni. Labu takaia ono tagataga ne iebulodi nge tamoata be aine takadi Iesus dite ambe mate-lo be imarang be diradi, ata di lama tago diuni. Tanepoa Iesus tagataga ne iradia-doi, kodeka Nanaranga idoki be lang anua-lo ikautakingaki be kaba aradi bibiatuka oana-nao isoaki.



"Maka ma Nanaranga tamoata be aine  
moarunga kateka ngaenao  
ireretakidia-tina. Bokaibe Natu  
tekenalana-tina nge idoki be  
tamoata be aine moarunga  
kateka ngaenao iandi."



“Bokai masa tamoata naita Natu nga  
lama iunani nge tago iboadu ngaleua.  
Masa moauriuri-la nem-kusoaki  
ngasukoaki.”



Rom 3:23 Bakara, tamoata moarunga nge muzigoala diemaki be tago iboadu Nanaranga kaiboang be malama ne daita.

Rom 6:23 Maka ma muzigoala zazanga ne nge mate, ata Nanaranga lumaluma ne nge nem-kusoaki soaki ipurapura. Be nem-kusoaki soaki ipurapura nge Tanepoa neda Kristus Iesus-lo ka dokia ipurapura.

Ibru 9:27 Be bokainatuka-la, tamoata moarunga nge bong-la teke-teke ka damatemate kana, be alauri nge Nanaranga aro datui be giriki nedi ngaliliti kana.

Epises 2:8,9 Maka ma nge Nanaranga marou ne tadokidoki-ba ane ka lama kauni be iuketi-kaming. Tago malipi teke kaemaki. Tago-tina. Nge Nanaranga lumaluma ne kata ka iang-kaming-ba. Nge tago malipinga-ming ulikadi kaoa! Bokaibe tago teke iboadu ono ngaduasare be nena-la ngaraketukai.



Rom 10:9,10 Bakara, uasim ane be mangata bokai kupile, "Iesus ka Tanepoa," be ilom-lo be lama kuni Nanaranga ka mate-lo be imarangaki nge uketam ngapura-la be kana. Bakara, iloda-lo be lama tauni ka Nanaranga mata-nao tado. Be aoa-da ane be lama unianga neda mangata tarangaki ka Nanaranga iuketi-kita.

Zon 3:16,17 "Maka ma Nanaranga tamoata be aine moarunga kateka ngaenao ireretakidia-tina. Bokaibe Natu tekenalana-tina nge idoki be tamoata be aine moarunga kateka ngaenao iandi. Bokai masa tamoata naita Natu ngae lama iunani nge tago iboadu ngaleua. Masa moauriuri-la nem-kusoaki ngasukoaki. Nanaranga nena-la be Natu makare kateka-o inepiarua nge tago tamoata be aine maka kateka-o ngalilitidi be ngara-leuadi kana. Tago-la. Ngauketidi be ngamuleakidi kana ka ipura."



1 Zon 5:11-13 Pile Nanaranga mangata irangaki nge labudi bokai: Nanaranga ambe ono moauriuri-la nem-kusoaki soaki nge iang-kita. Moauriuri-la nem-kusoaki soaki ngae nge Natu-nalo ka ieno. Bokaibe tamoata naita Nanaranga Natu lama iunani be idokimatei nge moauriuri-la nem-kusoaki soaki ipurapura ienoni. Be bokainatuka-la, tamoata naita Nanaranga Natu tago lama iunani be idokimatei nge moauriuri-la nem-kusoaki soaki ipurapura nge tago ienoni. Pile ngaedi ugere-kaming nge daduma-kaming be ono kamakauatina-ua moauriuri nem-kusoaki soaki ipurapura nge kam-lo ieno. Bakara, kam nge Nanaranga Natu lama kaunani.



Matiu 26-28; Lukas 22-24; Zon 13-21

Storyline by: Edward D. Hughes

Illustrated by: Janie Forest  
and Alastair Paterson

Adapted by: Lyn Doerksen

Manam NT (mva) © 1996, Wycliffe Bible Translators, Inc.  
All rights reserved.

<https://live.bible.is/bible/MVABTA/MAT/1>

©2026 Bible for Children, Inc.

[www.M1914.org](http://www.M1914.org)

[www.bibleforchildren.org](http://www.bibleforchildren.org)

